

D'Léierchen

Kaum huet d'Feld dat frëndlecht Feier
Vun der Aussentssonn gesunn
As mam Plou aus Stall a Scheier
4 D'lescht e Bauer ausgezunn.

Fir de Plou em nach ze driiwen
War säi Jéngelchen aläert,
Deen nët wëllt doheem méi bleiwen
8 An e souz um viischte Päerd.

Op der Schëllche stoung ze denken
D'Léierche mam Häerz voll Lidder
Fir de Béifchen nach ze zänken
12 Duckelt s'an de Som sech nidder.

Bis e laascht war, an du stëmmt se
Un e Liddchen, datt et kraacht
Op der Nouteleder klëmmt se
16 Datt dem Béifchen d'Häerz alt laacht.

An du sot en: Papp, ech mengen
Bal de Vull dee kënnt och schwätzen.
Lauschter, sot de Papp zum Klengen,
20 Ech kann d'Liddchen iwersetzen.

I

Bas de do, mäi léiwe Frëndchen
Ma de Wanter dee war laang!
Kuck, ech hat keng fréilech Stënnchen
24 'T war fir dech a mech mer baang.

An du koum ech dech besichen
Well du gouns nët méi eraus
Mann wat hues jo du eng Kichen
28 Wat eng Scheier wat en Haus.

Wi zerguttster, a wat Saachen!
An déng Fräche gouf mer Brout.
An déng Kanner, wi se laachen,
32 An hir Bäckelcher, wi rout!

Jo, bei dir as Rot nët deier!
Jo a kuck mer wat eng Mëscht.
Dat gët Saache fir an d'Scheier
36 An och Suë fir an d'Këscht.

Muerges waars de schuns um Dreschen
Ir der Daudes d'Schung sech stréckt
Bas am Do duurch Wis a Päschen
40 Laascht all Waassergruef geschréckt.

Jaa, dir wäerd schuns näischt entlafen
A keng Bessréng geet verluer
Wien dech géif fir Efalt kafen
44 Krit jo fir säi Geld keng Wuer.

Eemol koum en aarmen Alen,
An ech houl et wuel an Uecht
Dass de gouf dem schwaache, kalen
48 Vun dem Dësch de ganze Ruecht.

An du schécks e bei den Uewen
An du schwaats em Freed a Mutt.
Bauer, kuck ech muss dech luewen
52 Du gefälls mer vill ze gutt.

Duecht ech wuel, du géifs bal kommen!
D'Hieselhecken hu geblitt
An de Schnéi as all verschwonnen
56 Dann as d'Zäit jo datt ee plitt.

Rüchteg, gläich beim Fréijoorswëndchen
Këmms de mat dem Plou gezunn;
Frou as wi e Kiirmeskëndchen
60 Sin ech nun erbäi geflunn.

Du waars fir mäi Kannerträppchen
An dem Frascht de guttste Mann
An dir sange fir all Gräppchen
64 Ech all Lidder déi ech kann.

Weess d'och, alles huet dech gären
D'ganz Gewan se mécht der Freed
Kucks de no a kucks de fären
68 Alles gréisst dech wäit a breet.

Do as d'Wis am grénge Kleedchen
Kuck wi laacht se dir sou léif
D'Grieschen och hiirt butzeg Meedchen
72 Kuckt der no a steet op d'Zéif.

An ech hu mam Weesseseemchen
Och schuns dénger Rieds gehat,
Mat all Wis a Feld a Beemchen
76 Hun och vun dir geschwat.
76 och duerggestrach, vill driwwer geschriwwen

D'Wis, déi sot: ech brénge Fudder
Fir séng Päerd a fir séng Kéi
An de Kléi och hire Brudder
80 Sot: ech bréngen em nach méi.